

四庫全書

史部

欽定四庫全書

史部

唐大詔令集卷

四十九至
五十二

詳校官編修臣范來宗

編修臣裴謙覆勘

總校官編修臣倉聖脉

校對官學正臣常循

謄錄監生臣甯汝欄

欽定四庫全書

唐大詔令集卷四十九

宋 宋敏求 編

大臣

宰相

命相六

舒元興李訓平章事制

鄭覃平章事制

李石平章事制

李固言平章事制

陳夷行平章事制

楊嗣復平章事制

裴度中書令制

崔鄆平章事制

崔珙平章事制

杜棕平章事制

李回平章事制

崔鉉魏扶平章事制

崔龜從平章事制

魏謩平章事制

裴休平章事制

命相六

舒元興李訓平章事制

出納王命流品衆職覃理化於區夏謹法度於巖廊是

有文可經邦才惟濟代列於百辟之上俾輝三台之光今
我夢勞果獲惟肖爰舉並命以寵非常朝議卽守御史
中丞兼刑部侍郎上柱國賜紫金魚袋舒元興杞梓長材
金玉正性道懷丙魏詞瞻菁英居然不器之能雅蹈中庸
之美自擢領綱紀肅清朝廷碩望允歸於同朝讜言莫匪
乎體國守兵部郎中知制誥充翰林學士賜緋魚袋李
訓軒纓鼎族河嶽間賢德茂阜夔文含雅誥窮易超象
繫之表吐論成邦國之經洎叅職內庭發揮王度盛業見

乎造膝明識藹於伏蒲並冲敏執中端粹不倚咸藹莫
磷之志克弘作礪之規珪璋有聲鸞鳳有采朕常法
言高視所寶惟賢方清化源遂得時傑於戲君執象以
端宸臣推公以秉鈞夙夜一心小大同體則和天地序
陰陽臻乎治平吾所寢寤爾宜率匡國之道明理人之
方俾其致君無愧往哲咸陟樞柄佇弘大猷秋官禮闈
莫非寵任祇厥成命往惟欽哉往者朕究大易皆訓之
義也尚未終卷政事之暇宜三兩日一度入翰林元輿

可守尚書刑部侍郎同中書門下平章事訓可守尚書
禮部侍郎同中書門下平章事仍賜紫金魚袋

太和九年九月

鄭覃平章事制

歸融

朕嗣守丕圖務弘至理憂勤是切宵旰靡遑所以庶政
萬幾委諸丞相乃者失於任使妖沴遽生方思正人叅
我大柄銀青光祿大夫守尚書右僕射上柱國滎陽郡
開國男食邑二千戶鄭覃天資直氣岳降上才性惟端
莊道本孤峻文含風雅學洞儒玄通古今理亂之源達

教化損益之要歷踐華貫周旋大僚休聞彰於搢紳政
事滿於臺閣載居講席密勿內庭曾襟洞開肝鬲無隱
嘗奏謹論發言有先見之明每勵貞規勇退守獨立之節
洎擢膺揆務總領庶官堅操不回墜典皆舉盡瘁憂國
竭忠戴君必能毗予一人康濟四海邪正之路既判清
濁之流自分於戲秉茲鈞衡委乃髦碩爾其使萬事得
其序百官得其人用賢罔不精立法罔不慎弼亮刑政
變和陰陽其聽朕言往踐厥位克紹先德巖廊有光可

守本官同中書門下平章事散官勲封如故

太和九年十一月

李石平章事制

朕嗣立君位精求至道日慎一日於今十年所期輔佐之臣為我致理中立匪懈知無不為今得其人果副僉屬朝議即尚書戶部侍郎判度支上柱國賜紫金魚袋李石操履堅貞志業弘茂性合道要識通化源累佐藩方備聞勲績用司夕拜之任旋加尹正之榮爰委財征備宣成効是宜擢膺輔弼俾勵政經爾當勤成務之規

率致君之道內貞百度外靖四方叅毗宏規課程庶績
盡匪躬之節竭宣力之能大振朝綱兼司國計致億兆
之庶富成方夏之又安副予知臣勉茂休烈可朝議大
夫守本官同中書門下平章事仍依前判度支勲賜如故

太和九年
十一月

李固言平章事制

自昔皇王之有天下也君非臣罔以濟其理臣遇君然
後顯其才以調陰陽以承法度雖堯舜不能自聖雖皋

變不能自賢君臣相須今古同體余之夢卜實有慕焉
檢校兵部尚書兼興元尹御史大夫山南西道節度管
內觀察處置等使李固言稟河洛之上靈孕乾坤之間
氣孤退獨立公忠自持擅菁英之雄文洞旨要之興學
仁歸信厚動合典謨巖廊正人中外全德官寮夙望殷
乎華夷歷居大僚咸稱厥職乃者擢自輔相委之樞衡
不依違以徇人每精恪以憂國植躬而謇諤彌勵純和而
節操不渝洎仗鉞漢中頒我條詔端嚴以訓齊師律寬

惠以綏撫蒸黎遂用徵還俾副公議召至宣室前席與
言聽其誠詞皆臻理化是宜再叅大柄正位黃樞為朝
廷之股肱聳搢紳之耳目康濟四海毗予一人是非罔
及於愛憎任用必分其清濁有犯無隱進思弼違勿忝
我知更光爾道可守門下侍郎同中書門下平章事

開成

元年

四月

陳夷行平章事制

王者任賢能所以緝熙庶績舉正直期乎獻可弼違苟

非懋茲大任何以光乎四海翰林學士將仕郎守尚書
工部侍郎知制誥兼太子侍讀上騎都尉賜紫金魚袋
陳夷行元精降靈厚載儲祉聚蓄英粹作時休祥懷道
清貞執德謙茂行高嵩華弘包容之雅量明洞水鏡韜
妍垂於默識豈滋潔遇物能寬雖墻岸孤峻襟抱夷曠孝友為
修己之具文學誠潤色之餘衆推全才時號端士頃在
郎署雅有名稱是用擢居禁密俾輔導元良論辨見賢
人之業教諭得名臣之體星宮屢改才術彌彰古稱旁

蔡夢卜曷若選之於言行是用付以政柄登於台階任
茲鈞衡之重處以臯夔之秩人所注意予將仰成勉陳
啟沃之術以副具瞻之望可守本官同中書門下平章
事散官勲賜如故

開元二
年四月

楊嗣復李珣平章事制

運行帝載翊贊天工必俟輔臣以宣至化將益秉鈞之
重是資並命之求諸道鹽鐵轉運等使正議大夫守戶
部尚書上柱國弘農郡開國伯食邑七百戶賜紫金魚

袋楊嗣復動必居正言惟在公峻若孤山清猶止水從
政稟詩書之教承家達禮樂之源朝議郎守戶部侍郎
判戶部事上柱國賜紫金魚袋李珣質本溫明才惟俊
茂智能周物弘本容非守和有君子之儒可大見賢人
之業咸挺為國傑秀稟元精生必為時寶稱希代便蕃清
秩操履有常調黃鐘而協諧和朱絃而踈越或總戎重鎮
敷惠寧人卒乘有輯睦之功惇嫠著昭蘓之詠洎入司
邦賦爰掌版圖事未展長公望猶鬱是可以宰領樞務用弼

予違叙彝倫而建大中罄訏謨而調元氣又寧華夏保
合神人宜申補袞之規致我垂衣之理於戲孔明匡弼
峙之國尚聞魚水之詞夷吾輔霸業之君猶致鴻翼之
論矧予祇荷丕構雖未克前修造次之間而不忘遵道
宵衣旰食一紀於茲災殄尚生於旱蝗黎元屢困於衣
食中夜靜慮若涉大川將求津涯俟爾而濟爾謂是靡
以拂吾心而不行爾謂非靡以徇吾志而苟用開物成
務俾人於得時求賢審官寧我以多士則魚水鴻翼夫

何足言勉副簡求無忝我休命嗣復可守本官同中書
門下平章事依前充諸道鹽鐵使珣可守本官同中書
門下平章事依前判戶部事嗣復勲賜如故珣散官勲
賜如故

開成三年正月

裴度中書令制

緝熙政柄亮采皇猷弘道德以輔昌圖調陰陽而平經
緯我惟求舊人亦與能正位台階實資元老河東節度
觀察處置等使開府儀同三司守司徒兼中書令太原

尹北都留守上柱國晉國公食邑三千戶實封三百戶
裴度星辰稟秀山岳炳靈文蔚采章量苞江海負經邦
之遠畧懷許國之明誠研幾而識洞著龜運籌而道光
竹帛風雨一致儀型四朝萬邦所瞻百辟為憲洎揚兵
旌塞建旆龍山謹管籥而戎索烟清壯襟帶而軍牙氣
肅冠絕南牧聲雄北門懿茲殊庸朕所嘉歎是用專授
衡軸俾清化源統和神人茂育區夏夫宰相之任作予
股肱外可以懷柔四夷內可以親附百姓大可以贊亭

毒阜生成小可以激貪廉正雅俗爾有休躅予不重言
至於玉立巖廊風行號令端若植表為時司南開予胸
襟端我視聽實賴人傑代茲天工爰罷麾幢再操舟楫

展乞言之禮豈惟論道之尊佇竭訏謨無虛毗倚可

守司徒兼中書令散官勲封如故

開成三年
十二月

崔郾平章事制

朕丕承寶圖思臻古理小大之政皆倚輔臣選衆攸難得
命授中大夫守太常卿上柱國賜紫金魚袋崔郾天資

正性岳降瓌材慎揚震之四知高臯陶之九德抱負直
質秀發英華動謠中和言皆體要聚學每採於精蹟馳
騁九流摘文若奏乎笙簧抑揚三代鴻量難挹懿聲自
高乃者入典訓詞出司俊髦能用周密靡混妍媸銓總
以明允為先廉察以澄清為重踐其職任顯有休功秩
宗之選方登公台之論彌鬱由是酌其望實付以鈞衡
恢予之規摹廣予之耳目於戲宰相之任弼諧是資予
欲使六氣均調惟爾贊予欲使萬方平乂惟爾成予欲

使臣工得職惟爾諧予欲使斜正不亂惟爾翼言罔慮
於咈耳進無忘於沃心貞觀開元之法度具存房魏姚
宋之規猷盡在咨爾丞相舉而行之可守本官同中書
門下平章事散官勲封如故

開成四年七月

崔珙平章事制

一日萬幾熙帝載者輔相予違爾弼成台德者股肱天
將瑞時必有人傑況當出震之日實藉濟川之才諸道
鹽鐵轉運等使銀青光祿大夫守刑部尚書上柱國崔

琪應期而生希代之寶量涵海岳明並日月懷倜儻之
竒姿抱英邁之正氣挺質而珪璋比德彰纓而冠蓋盈
門立言每見於經邦行已諒先於及物早持旄節再踐
郊壇柔獷悍為忠義之心變封疆為禮樂之俗信入人
腹令行軍牙及尹正神州儀刑郡國剛能嫉惡明可照
奸三輔弘取則之風四方稟承流之化泉司筦擁益茂
器能精若鑑金利逾淬刃歲以饒羨國用富强懿乃成
功允諧選衆是宜亮采皇極陟降台階調陰陽於至和

濟生靈於將泰四維咸舉百度以貞俾時式庸佐朕為
理夫周以冢宰制國用漢以丞相調兵食猶怙宰益之
務往居鈞軸之尊后德惟臣良臣惟聖汝其納誨予亦
踐言勉符魚水之資永贊文明之化服茲休命敬之敬
之可守本官同中書門下平章事依前充諸道鹽鐵轉

運等使

開成五
年五月

杜悰平章事制

朕顧惟眇身繼承大構思有以允釐百事表率萬邦進

髦傑於台階庶緝熙於帝載布誠聽問側席眷求爰於
岳牧之中載協著龜之兆乃舉成命以副具瞻淮南節
度副大使知節度事充諸道鹽鐵轉運等使光祿大夫
檢校尚書右僕射杜悰器宇恢弘襟度夷曠學通九經
之要道符百代之源寒松不凋貞玉無玷忠信勵事君
之節勤慎得成務之才任歷殷繁志惟匡益洎臨淮海
兼掌貨泉開張多濟物之功饒羨指助軍之獻既而積
粟應輓儲儲幣待供師徒無歉食之虞餽給有贏財之備

克就戎事在我元臣是以付以國鈞俾司邦計仍征筦
權之重務藉輸經濟之良能師長百寮亦從舊貫往踐
大位爾其欽哉於戲惟理亂在庶官矧乎輔翼之臣寅
亮代天之化必在叅修政本振起皇綱興禮樂以厚人
倫竭謀猷以清氛禋期於啟沃以弼予違無金玉爾音
將孤於虛佇也可檢校尚書右僕射同中書門下平章

事充度支兼諸道鹽鐵轉運等使

會昌四年閏七月甲辰

李回平章事制

我唐之盛實曰貞觀開元則有若房杜姚宋彌綸大業
雖二祖之克聖亦良弼之是賴朕自膺寶祚於茲六年
未嘗一日不念貞觀開元之至理其命相也敢容易哉
是用蓋臣冀臻於道戶部侍郎判戶部事李回風雲玄
感山岳降神蔚為人寶好道天爵心無適莫惟直是從
事不留滯應機輒發靈府可以調元氣宏材可以濟巨
川有君子欲訥之言有賢人可大之業掌綸西掖克潤
王猷簡任南臺是稱邦直每揚清以激濁嘗持正以照

邪凡有敷揚皆稱朕意況副予愛予功機和我掌彼版
圖時維舉職歷試皆可實獲我心是宜叅務中樞啟揚
庶績式光帝載且寵正人敬往欽哉無替休命可中書
侍郎同中書門下平章事充集賢殿大學士依前判戶

部事

會昌五年
五月乙丑

崔鉉魏扶平章事制

潤色王業允俟於良臣丹青帝圖必資於宰輔朕嗣膺
大寶思闡鴻猷永惟化源實屬髦傑所期調六氣以遂

物總萬機而富人夢帝賚予爰立作相正議大夫守御
史大夫崔鉉山河秀氣經緯長才金聲含正始之和玉
立在風塵之表正議大夫行尚書兵部侍郎判戶部事
魏扶天與全德性惟中庸有致遠之宏謀負佐王之盛
業並操身特立抱氣挺生高標旁映於羣倫明議動符
於大雅早登華顯備閑休嘉穆然清明鬱有素望居易
求己秉仁立誠每懷憂國之心益竭徇公之志或早以
精慮升於鼎司深陳造膝之言密勵匪躬之節或嘗以

敏用服於大寮智可洞於機權才復推於練達度委綱
憲仗名節而立朝亦總地官嘗會計而經國紀綱式叙
征賦益饒陟其休庸付以大柄朕欲宣明號令弘濟生
靈致寰海之乂安復河隍之土宇爾宜從容奏議朝夕
揣摩副華夏之具瞻展舟航之大用敬服明訓式揚茂
勲鉉可中書侍郎同中書門下平章事扶可守本官同

中書門下平章事

太和三年四月

崔龜從平章事制

丹青神化寅亮天工將寄陶鈞必歸才望故漢中大業
魏邴克贊其謨謀開元盛時姚宋同匡其治理嘗覽前
載緬懷斯人寤寐以求夢卜終協適當舉衆不讓知賢
戶部尚書判度支崔龜從道峻嵩華志凌霄漢氣包元
精識邁前哲巖廊符瑞禮樂英華弘通多鑑物之明堅
正抱佐時之術而學窮源委詞涌濤波吐論素勵於公
忠理躬不踰於信厚烈焰方熾珪璋更寒飛霜已嚴竹
栢猶翠自出入劇職廻翔清途經歷五年恭勤一貫粉

署潔賜衣之操掖垣高白鳳之文澄清宣威節制持重
暨位延舊德再掌地圖任切良材柄耑國用閭闔不困
帑藏有餘邦賦程均節之能軍食表供須之効我有好
爵本邀茂勲況乎國禎宜在人傑是用命汝同心弼予
升於鼎司執此政柄吉甫德全於文武彥回望著於台
衡既諧具瞻實允元輔當酌古訓以恢今猷帖人部喉
舌之雄免計曾經費之務期爾鎮撫式彰顯榮於戲惟
木從繩載懷藥石之戒惟風偃草冀流霖雨之功與其

順美以昭忠不若盡規而輔德與其嚴刑而就理不若
齊禮以安人佇聞嘉言共底交泰無令伊傅獨美典墳
可戶部尚書同中書門下平章事

大中四年六月

魏謩平章事制

天不能獨運任寒暑而成歲功君所以稱尊仗股肱而
熙帝載高拱巖廊之上卒成天地之宜故風后登庸軒
圖以穆文終佐理漢業遂昌何莫由斯夫豈相遠爰感
風雲之會果符夢卜之求屬在休期俾升良弼戶部侍

郎判戶部事魏謩膺賢運之間氣蓄王佐之洪材山岳
孤高珪璋特達道德忠信資以修身文章政事乃其餘
力自騰芳詞苑振跡諫垣文宗知臣深加寵遇檢校甚
峻守道不回未至達官蔚為國器星霜屢變流落幾途
秀木摧風燎原見玉汲黯心存乎廊廟望之志在於本
朝朕獲奉寶圖勵精治本盡伸人隱思變時雍佇聞宣
室之言是有夕靡之拜偉其風望委以憲綱正色立朝
不仁自遠貳於卿秩掌我地征吏不敢欺身無伐善彌

見精強之用頗聞流衍之能朕嘗咨以謨猷觀其識畧
動中理會慮必輸忠切劘每賴於沃心慷慨不忘於造
膝是宜樹為明表載之休聲俾增輝於三台允僉諧於
四岳於戲調鹽梅之元鼎濟舟楫之巨川上維四方之
安危下繫羣生之舒慘居是任者不其重歟夫激濁揚
清衆自聳善存誠去偽人斯歸厚爾其開張教化之具
導迎陰陽之和使萬物各遂其宜百官得任其體昔爾
先祖為唐輔臣人鏡之名阿衡比德爾尚纂承義訓克

嗣清風勉思貽厥之謀以闡將明之業勿畏嫌而避事
無執謙以自疑永孚於休用觀乃績可守本官同中書

門下平章事

大中五年十月

裴休平章事制

我國家之稱至理其惟貞觀開元乎雖盛德成於祖宗
而致君存乎輔弼委是不構付於冲人實資獻臣共荷
洪業俾登玉鉉用振金聲正議大夫守禮部尚書充諸
道鹽鐵轉運等使裴休明堂梁棟清廟瑚璉道崇五美

學綜九流持去邪與善之心蘊尊主濟時之術早升甲
乙首冠賢良諫垣馳讜正之名史氏動直言之筆羽儀
著定律呂縉紳仙闡道播於彌綸右掖詞推於潤色三
臨藩郡皆垂良吏之能四貳卿曹益見大臣之體洎乎
司貨泉之重筦山澤之財用適變通法均寬猛大計如
富強之業常規多饒羨之功人無告勞乃有餘地是可
以載光袞職爰陟台階式贊雍熙宜膺夢卜爾其允釐
庶績盛起訐謨涉大川而示吾津涯馭六馬而遺吾銜

策俾臻皇極克嗣前修於戲人代天工予違汝弼悉乃
心力作吾股肱無使阿衡專美於殷家山甫獨稱於周
室勉弘懿德勿忝虛懷可守本官同中書門下平章事

依前充諸道鹽鐵轉運等使

大中六年八月

唐大詔令集卷四十九

欽定四庫全書

唐大詔令集卷五十

宋 宋敏求 編

大臣

宰相

命相七

鄭朗平章事制

崔慎由平章事制

蕭鄴平章事制

劉琢平章事制

夏侯孜平章事制

杜審權平章事制

夏侯孜平章事制

楊収平章事制

于琮平章事制

王鐸蕭遘平章事制

鄭畋平章事制

韋昭度平章事制

陸扆平章事制

朱朴平章事制

崔胤崔遠平章事制

王搏平章事制

張文蔚平章事制

楊涉平章事制

命相七

鄭朗平章事制

雲因龍興龍非雲無以施膏澤臣由君用君非臣無以
播皇猷信乎際會相須以康天下永言良弼常切寤思
詳求國禎乃獲時傑通議大夫上柱國賜紫金魚袋鄭
朗間代應期稟靈作瑞王室髦彥士林菁英溫華凝珪
玉之姿磊落負棟梁之任諫垣蘭省常推讜正之風廉
俗登壇克懋撫循之績洎領劇務益見蓋忠杜邪徑而

啟公逋懲奸吏而絕私託饋軍無闕贍國有經委以憲
綱尤彰直道是宜毗贊大業翊宣景化朕以區區齊晉
取霸諸侯率由三賢協心五臣同德況今四海為宅百
辟盈廷未能寇靖塞陸人歸壽域豈無長策俾及昇平
惕然疚懷莫知攸措肆予命汝往踐台堦勉弘濟代之
功罔致曠官之誚善調兵食以備我邊虞慎舉典章以
貞我庶品敬戒於位惟其有終可工部尚書同中書門

下平章事

大中十年
正月丁巳

崔慎由平章事制

朕恭守睿圖勵精理道祇勤萬務靡不經心緬思垂拱
以化成莫若得賢而共濟載勞夢卜果獲貞良大中大
夫守尚書戶部侍郎判戶部事上柱國賜紫金魚袋崔
慎由山岳降靈和粹毓德儀標鸞鳳識洞著龜文為華
國行冠人表朱紘含清越之奏白玉凝鎮密之姿播英
聲於士林彰美望於公器洎擢叅內署潤色王猷忠讜
盡規誠明納誨既而廉問南服宣暢皇風盪寇消災人

安政集康一方之疲俗復二職於中臺議論必本於古
今趣尚自歸其雅正澗河之右仍歲艱荒一自鎮臨載
聞惠化俾司征賦益覩公忠固可以升於台階秉我大
柄爰授相印用叅樞務於戲天地之道成歲功者陰陽
帝王之基保鴻業者輔相念茲匡贊之大宜竭啟沃之
道必使貞百度以振國經凝庶績以弘理本茂育區夏
統和神人允資魚水之諧克致休明之運永綏厥位無
忝諸臣可守工部侍郎同中書門下平章事

大中十年
十二月

蕭鄴平章事制

輔相之任也調陰陽而撫夷夏貞百度而康兆人代天
工為持國之柄殷夢周卜竭誠待賢伊何人哉予獨不
可寘於精懇果得髦傑朝散大夫守尚書兵部侍郎判
度支上柱國彭城縣開國男食邑三百戶賜紫金魚袋
蕭鄴天實佑朕生此令人星辰降祥珪玉含瑞蘊通明
經遠之識抱宰制利用之才載居禁垣重參宥密資委既至
忠謹愈聞爰付地征仍司邦計善為均節益茂事功道

惟剛明人無侵撓風望彌峻遐邇具瞻思致昌期必資
俊德是以簡自朕心叶於僉諧擢登中樞持平庶政爾
其體太和而順元氣推至心以序彞倫短長之才罔有
所廢細大之務一以居心扶皇極而作國楨庇蒼生而
遂物性雖堯舜比聖朕豈敢言而夔龍致君爾無多讓
周以冢宰致國用漢任丞相調兵食斯舊典也爾其懋
建嘉庸對此崇寵可守本官同中書門下平章事仍判

度支

大中十一年七月

劉琢平章事制

闡大化以建皇極敷至德以乂黔首百度惟允八荒用
寧倚於輔臣付以邦柄求之夢獵協於著龜克諧明謨
允屬僉議稽能必思於廟畧疇德佇煥其國經朝議大
夫守尚書戶部侍郎判度支上柱國賜紫金魚袋劉琢
岳彩舒輝鸞姿降靈馭煙霄而六轡齊昇布雲和而九
成合奏行居人表文著國華潤色詞林早叅宥密彩筆
既符於夢卜溫樹不漏於私言再秉絲綸貳於刑讞振

藻益茂聽詞無冤洎尹正洛師擁旄梁苑咸能變風俗
而求人瘼和號令以肅軍威重委北門輯茲王業既聞
報政果叶予懷是用付以煩難慎司邦計彌月探執繫
時功成已洽咎夔之風宜膺台階之命爾其平章百姓
揚敷五教使羣職必舉四夷率賓杜回邪之迹開讜正
之門大道必寘其沃心忠信無懼於逆耳於戲小大之
政既已咨之成務且輟於司存均節尚煩於廟筭佩我
明訓服茲休嘉可中書門下平章事依前判度支

大中
十二

年正月

夏侯攷平章事制

自古有天下得列聖帝哲王之科者必由良臣以就景
化故君非輔弼無以啟昌期時未清平不得稱賢相契
合交感相須而成苟非其人豈副斯舉朝請大夫尚書
兵部侍郎充諸道鹽鐵轉運使上柱國賜紫金魚袋夏
侯攷禮樂重德簪裾上流才兼神器智可周物蘊範時
之行義富經國之文章誠探奧微器抱冲粹早彰清烈

克著令名用當七月匡諫無隱再歷三獨禮繩不回廉
風俗而政清提紀綱而望振旋領版籍亦司牢盆推公
秉持息力完緝法得其倫要吏憚其威稜國財可豐官
事具舉是用陟此邦傑付之廟謨既諧朕心且洽僉論
於戲宰輔之臣羣倫共瞻政垂其宜則四海罹弊事叶
其序則萬人以蘓副吾拔擢之恩勵爾熒諧之道朝廷
聳望爾其戒之可中書門下平章事轉運使

大中十二年四月

杜審權平章事制

天設四序運寒暑而成歲功國有三台仰弼諧以助君
道安危是繫選任攸難况朕涉道未明纂圖方始詳求
英彥思付洪鈞至誠感通果獲良輔翰林學士承旨通
議大夫守尚書兵部侍郎知制誥上柱國賜紫金魚袋
杜審權喬岳望崇澄波量度稟五行之秀氣挺百仞之
貞材虹玉潛輝龍泉蘊利文窮騷雅學洞玄儒毛价有
古人之風邴吉得大臣之體自便蕃華貫揚歷清途南宮
擅視草之工西掖茂掌綸之業洎司文柄俾以掄才全

任至公號為得士甘棠廉問衆著謳謠秋卿恤刑事無
枉撓先皇帝因藉其令譽擢處禁林振藻屬詞發揮神
化道一貫於終始器兼適於圓方逮余建統屢承密旨
每多弘益彌見慎修既彰已試之能宜懋殊常之寵是
用委茲大政列在中樞為朝廷之表儀實人臣之極地
爾尚竭乃心力作吾股肱借箸必罄其嘉謨推局罔遺
於善策用無黨之道行惟一之心使爵位功名並光竹
帛垂於不朽副茲寵榮往欽哉可守本官同中書門下平

章事

大正十二年十二月

夏侯孜平章事制

篤楫克修航艦以之濟海羽翮可厲鷗鴻於是摩天朕
恭已震瀛勞誠夢獵將以篤楫賢輔羽翮寶臣踵三代
至理之英濟羣生普洽之欲載仗舊德期獲我心劍南
西川節度副大使知節度事管内觀察處置統押近界
諸蠻及西川八國雲南安撫等使光祿大夫檢校尚書
右僕射同中書門下平章事兼成都尹上柱國譙郡開

國公食邑二千戶夏侯攷大昴分精維嵩挺秀擅四海
之賢俊作中朝之表儀禮樂詩書資其懿範溫恭孝愛
輔以多才服道而致身含章而底力經國之用貫百川
而不改其清應物之明體萬象而莫窮其照周踐華列
多識舊章卽署諫垣休聲夙振東陽故絳惠愛洽聞洎
甘棠政成天府徵命兼領臺轄之任再居邦憲之尊正
色無私當官必舉總征賦以贍國幹山澤而富人美利
無遺嘉猷益覩積是朝德昇於台司內竭謨明外弘體

理馳咎夔之極摯陋周漢之遐蹤克彰為輔之聲允協
有聞之契屬者以西南重鎮邊徼多虞爰賴專征以隆
外間福星時雨既惠巴庸景化元和須歸鼎鉉是用召
於駟騎待以天工重開集鳳之池再仰問牛之化弼諧
萬務師長庶寮亟付機衡俾康區夏於戲刀非礪不割
魚非水不行為君誠難得時甚易決疑定計吾以爾為
神龜肥國救人吾以爾為上藥盡布四體懋堅一心勉
哉勿疑對揚休命可尚書左僕射同中書門下平章事

咸通三年七月

楊收平章事制

古先聖哲之御天下也莫不勞於擇賢逸於恭己是以
巖求匪易殷代稱宗畋獲甚難周王膺命肆朕在位天授
正人於言語侍從之間得亮米惠疇之美固亦高邁前
烈垂休當朝敬遵用汝之言爰舉弼予之典雅符不讓
斷自無私翰林承旨朝議大夫尚書兵部侍郎知制誥
上柱國賜紫金魚袋楊收器茂渾金寶欽大玉瑩清水

於溽暑挺綠桂於嚴霜行過曾顏道兼夷惠文冠一時
而若非游藝學窮千古而似不能言自鴻飛名場鷺振
班列憲署每聞其守法曲臺咸著於推公所蒞有聲歷
試皆可用彰簡要已洽譽於含香業擅精微遂騰輝於
視草戒慎攸至初終不渝常懷造膝之忠備見沃心之旨
謝安體識王儉才能動為僉論所諧居溢具瞻之望由
是擢於禁苑升以台階俾申匡輔之勤用畀燮和之重
爾其慕伊周之治弘臯益之謨九流既分百辟斯正嘉

猷可舒於前席妙畧尚在於止戈式序三才允歸一德
懋乃致主副予知臣無使載筆之休獨稱於姚宋也可

守本官同中書門下平章事

咸通三年三月

于琮平章事制

在天垂象常星既列於三台惟國建官庶政攸賴於四
輔朕每思至理益慕無為苟非正人莫付大柄爰得非
熊之兆乃遵審像之求契予知臣命爾作相銀青光祿
大夫尚書兵部侍郎充諸道鹽鐵轉運使駙馬都尉上

柱國于琮識洞著蔡文窮典謨居然國華蔚為人瑞自
策名筮仕淑問益高伏蒲彰正直之名起草著經綸之
績由是道光獨立業擅自強勇退無儔謙光有裕朕早
聞博雅堪備論思擢於南宮置之內署果能恪慎副相
端貞益實多繫賴洎出貳司冠亟居版圖見君子之
盡心表才之果醪府任重爰專之積弊潛聞其日除嘉
庸顯彰於歲計咨爾全美為予誠臣歷試如斯僉諧所
至是宜升於輔相付以變和惟賢式契於周官懋德雅

叶於殷誥且有成計爾其聽焉夫舉直則百度可貞推
公則彞倫攸叙進善孤寒不棄用才滯屈自伸克勉斯
言是為良弼敬承休命往其欽哉可守尚書兵部侍郎
中書門下平章事駙馬都尉

咸通八年七月

王鐸蕭遘平章事制

門下五帝垂衣本資乎輔弼三王御宇必藉其謀猷誠
聖哲之規章實邦家之軌範然則得其人則天下致理
輕其任則海內多虞興廢之端古今斯在開府儀同三

司行太子少師上柱國晉國公食邑三千戶王鐸台階
降瑞昇位呈祥峻極承天清暉助日保道德而立性因
文章而飾身良玉重貞精金百煉道惟經濟自西號以
安人術本匡時辭東山而為國洎歷揚中外出入班行
栖息鸞臺優游鳳沼榮膺三事冠絕羣寮致君之業彌
深及物之功益著朝散大夫守尚書兵部侍郎判度支
上柱國賜紫金魚袋蕭遘紫庭鍾律玄圃琳瑯韻協金
莖光昭宸蔽自精通藝行履歷清崇逸翰摩雲高踪絕

地近者臺稱綢職歲計成功霜威已戢其奸邪日用無
虧於饋輓昨以東隅寇盜嘯聚為羣俶擾關防奔衝畿
甸朕巡遊梁冀將復京都欲救生靈必資賢相乃朝廷
碩德社稷誠臣載君之力無窮許國之心益勵是使重
敷五教爰總萬機勿弃前修無忘厚獎乃孤標特立潔
白不渝利可剝犀清能鑒鬣輔成乾道兼領冬曹各副
憂勤可安宵旰鐸可門下侍郎兼司徒同中書門下平
章事散官勲賜如故仍令所司擇日備禮冊命邁可銀

青光祿大夫守工部侍郎門下平章事仍落判度支

事主者施行

中和元年正月

鄭畋平章事制

門下任賢勿貳有國之令圖惟帝念功昔人之善訓朕
遐觀往代每慎厥終其有道濟邦家任已崇於屏翰忠
存宗社義可貫於神明宜徵帷幄之謀重委廟堂之筭
冀清大難以啟中興開府儀同三司守太子少傅分司
東都上柱國滎陽縣開國侯食邑二千戶鄭畋八柱比

崇三階垂輝繁露演先儒之學高風追大雅之文外標
威鳳之儀內貯函牛之量煥如綸之旨共許才高被貝
錦之詞彌彰道直體茲全德歷試崇資燮贊中樞極致
君之事業鎮臨輔甸標坐樹之威名洎虜犯封畿塵飛
象魏避狄之謀既決微管之賴誠深而能竭預慮之機
用安君父舉從權之計以悞奸宄當代之勲格天比盛
此際咸思義舉盡蘊忠謀且聞盟主臧洪登壇有誓將軍
祖逖擊楫忘身致蕃漢之齊驅由懷柔之有術今則不

從人望內斷予衆罷列岳而登三公自金壇而昇玉鉉
魚水之懽盡在君臣之契可知於戲震宇未清予則仗
綏懷之毗園陵失守予則佇收尅之功次則揚忠化以
拯窮人弘無私而叙羣品山河有誓金石豈渝更候殊
庸以膺極寵可守司空兼門下侍郎同中書門下平章
事充太清宮使弘文館大學士餘如故仍命所司擇日
備禮冊命主者施行

中和二年二月

韋昭度平章事制

門下朕聞先王之命相者調燮陰陽則四時順其序均
和品類則萬物適其宜然後扶危持顛易亂成理俾生
植咸遂邦家克寧故周卜帝師得諸渭水殷夢賢佐求
之傅巖我擇股肱爰獲侍從翰林學士承旨銀青光祿
大夫行尚書兵部侍郎知制誥上柱國韋昭度誠貫金
石行通神明氣含元精識同著蔡窮文武施張之道作
棟梁舟楫之資為時間生作我良輔洎昇名俊造歷官
清華鴻翥九霄驥逸千里旋參宥密備著聲猷使我語言

進三代之風使我典則符百王之法當風雨之如晦勵
節敬恭念艱難之在途夙勤晨夜臨難得近臣之體効
忠彰明哲之心是用總以萬機納於百揆作邦之楨秉
國之鈞若魚水之相歡諒雲龍之合應君臣之道今古
攸同於戲竊逆滔天兵戈散地宮朝未復宗社靡寧爾
宜動察安危居圖匡濟設六奇之秘策發三畧之沉機
定元光於一戎振頽綱於四裔紹貞觀太平之業啟開
元中興之期光贊一人永阜羣庶勉集盛烈克勤公家往

欽哉敬服休命可守本官同中書門下平章事勲賜如

故主者施行

中和元年七月

陸扆平章事制

門下昔在太宗時則有房杜持國鈞在玄宗時則有姚
宋司政柄降於列聖代濟君臣是知股肱元首之間未
有不相資以成者也況我薦逢難運方計叛臣宜搜問
代之英冀適濟時之用其有懷材已試亮節孔彰俾膺
霖雨之求斯正彝倫之叙式舉茂典吾無所試翰林學

士承旨銀青光祿大夫守尚書左丞知制誥上柱國嘉興縣開國男食邑三百戶陸扆簡節正音溫光瑞玉咸護抱降神之韻珪璋挺華國之容色倚相之典墳紹平原之詞藻爰自高材赴召丹地代言絲綸必本於典謨獻納已觀其事業仍歲扈和鑒之狩六年專詔誥之勤讜正自持門望彌峻況爾伯祖贄昔以才行嘗居禁林當德宗避敵之秋實廼祖納言之日積其偉節昇於鼎司書命諫章流在人口是用選自密勿陟之台衡昭於

前光期以後効執我大柄貳茲地官既表殊恩且有丕
訓於戲奸宄尚熾干戈未平生靈流離宗社榛莽爾其
舉墜典正頹綱進賢良遠奸慝勿依違而避事無拱默
以樹恩庶乎艱難有望康濟往踐乃位敬而戒之可尚
書兵部侍郎同中書門下平章事

乾寧三年七月

朱朴平章事制

韓儀

門下夢傳巖而得真相則殷道中興獵渭濱而載獻臣
則周朝致理是知顯諸仁而藏諸用君子但守其沉機

懷其寶而迷其邦大器曷虛其顯位朕自夢難涓佇英
賢暗禱鬼神明祈日月果得其哲輔契予勤求朝散大
夫守國子毛詩博士上柱國賜紫金魚袋朱朴學業優
深識用精敏久回翔而不振彌貞吉以自多朕知其才
遂召與語理亂立分於言下聞所未聞兵農皆在於彀
中得所未得不覺前席為之改容須委化權用襄昌運
是乃振於庠序陟彼鈞衡自我拔奇寧拘品秩於戲時
風甚薄國步方難兵戈未息於近郊經制日隳於故事

宮闕焚蕩邑里凋虛外則未殄元兇內則未凝庶績整
我綱紀成我雍熙百度羣倫俟爾康濟勉思敬戒以服
寵章可朝散大夫中書門下平章事上柱國賜紫金魚
袋

乾寧二
年八月

崔胤崔遠平章事制

門下擇股肱良臣為社稷大計斯實安危之本必資經
濟之才應星象以調三台平陰陽而調六氣成彼非熊
之兆叶茲審象之求既偶通賢爰申並命扶危匡國致

理功臣新授武定軍節度湖南管内觀察處置等使金
紫光祿大夫檢校禮部尚書同中書門下平章事持節
都督潭州諸軍事兼潭州刺史上柱國清河郡開國侯
食邑一千戶崔胤公台貴冑禮樂名門秉直道以匡時
挺貞觀以華國玉山孤峭迥出千峯冰鏡澄明能涵萬
象翰林學士承旨銀青光祿大夫行尚書兵部侍郎知
制誥上柱國博陵縣開國男食邑三百戶崔遠珪璋蘊
德鸞鶴呈姿持偉望以標奇蘊神鋒而匿耀朱弦逸韻

既可禮天寶劍雄鉉宜乎折滯或繼應倚注屢執鈞衡
或巫處深嚴嘗司詔誥變理茂績敏嘿嘉名昭布朝倫
洋溢休稱而體國勵志問牛之美早傳戴羣識吐鳳之
名夙著宜陟重任詳觀厥能升諸喉舌之司寵以鑪錘
之用專秘殿之圖籍度會府之財征俾操化鈞仍綰邦
職當此艱難之運爰繫輔弼之功噫未復神州尚茲多
壘仍歲有征巡之役兆人懷蘇息之期予心浩然罔知
克濟咨爾良弼共成懿圖勉膺三事之榮恪奉一時之

寵眷可守中書侍郎兼戶部尚書同中書門下平章事
集賢殿大學士判度支遠可守本官同中書門下平章
事判戶部散官勲封並如故

乾寧三年九月

王搏平章事制

韓儀

門下朕聞軒轅得力牧而為五帝首夏禹任臯陶而為
三王祖雖不言而化自契於玄功而端拱仰成實咨於
哲輔況有嘗持大柄久竭訏謨振寅亮於巖廊立惠迪
之軌躅俾仍舊貫再委平衡斷自朕懷用符僉屬扶危

匡國致理功臣新授武勝軍節度浙江東道管内觀察
處置宣撫等使金紫光祿大夫檢校尚書右僕射同中
書門下平章事使持節越州諸軍事越州刺史上柱國
開國公食邑三千戶王搏道潔秋霜文含春彩動不渝
矩立必正方行中孚絕類之貞保大有匪躬之節訥於
言而敏於行深耻名浮竭其力而致其身惟將道勝頃
歲朕察其才智可委鈞衡拔自貳卿升之四輔果能推
誠匡國罄慮憂時敷沃心之嘉猷進苦口之良藥洎汧

岐叛渙京師戒嚴罔懼觸鱗屢陳逆耳且搏以明君待
我故每敢極言我以忠臣任搏亦當加獎納深知盡瘁
永用寘懷自鑒輅省方艱危扈蹕澄心無撓臨事應機
為時而生信非虛語昨以初清鏡水新蕩稽山慎擇周
材以康疲俗是用掇於台鼎俾踐師壇念卿前後奏陳
有犯無隱吾雖不敏深諒至忠靜復斯言皆合朕意謹
正之言久而彌芳雖浙右之瘡痍誠思惠養顧岐陽之
妖逆尤藉機籌宜歸班瑞之符却秉代天之筆爾宜內

凝庶績外殄元克勉精醫國之謀報我知臣之德天官
重位光祿崇階兼以命之用旌寵數服茲休命可不慎
歟可光祿大夫吏部尚書同中書門下平章事功臣勲
封並如故

乾寧三年十月

張文蔚平章事制

門下古者明王居億兆之上慮弗用乂兢兢業業卜選
夢徵思得全才俾謀共理付之台鉉仰以和平既諧作
礪之求允繼非熊之兆銀青光祿大夫行尚書禮部侍

即上柱國張文蔚字量冲穆襟靈坦平而又凌轢清
華騫翔顯重久居內署備著芳猷論事而高議昇平扈從
而志堅尊獎視草著博通之業寡言彰慎密之規朕乃擬
自翰垣委之大柄克盡搜揚之道頗開公正之門是用
列在鼎司咨之袞職爾其研求理道精鍊事機盡當朝
瞻國之謀究前代銷兵之術書載伊尹實惟阿衡今倚
任之亦惟若是敬乃於位思其有終可同中書門下平

章事餘並如故

天祐二
年三月

楊涉平章事制

門下持鈞軸以燮陰陽是資至德掌地征而富邦國必
仗通才難虛作礪之求式叶為霖之望金紫光祿大夫
守尚書吏部侍郎上柱國弘農縣開國伯食邑七百戶
楊涉代襲軒裳業通墳典踐履華曹周旋大僚陳太丘
雅尚清貧葛稚川不貪榮祿綽有休問喧在羣言往典
貢闈則文行兼採近司銓管則清濁咸分至必可稱動
皆垂範朕嗣丕祚虔思小康是用授以鈞衡委之征賦

爾其克申蘊蓄用副旁求使干戈速偃於四郊玉帛斷
歸於內帑仍司仙殿更重化源勉輔冲人臻於理道可
尚書吏部侍郎同中書門下平章事充集賢殿大學士

判戶部事散官勲封並如故

天祐二年二月

唐大詔令集卷五十

欽定四庫全書

唐大詔令集卷五十一

宋 宋敏求 編

大臣

宰相

館職

張說等監修國史勅

宋璟蘇頲修國史勅

蕭嵩集賢院學士修國史勅

裴光庭弘文館大學士制

陳希烈監秘書省圖書制

齊抗修國史制

李藩弘文館大學士制

牛僧孺集賢院大學士監修國史制

李固言崇文館大學士等制

魏謩監修國史等制

令狐綯弘文館大學士制

鄭朗監修國史等制

崔慎由監修國史等制

蕭業監修國史等制

夏侯孜集賢殿大學士制

白敏中弘文館大學士制

王鐸弘文館大學士等制

蕭遘監修國史等制

館職

張說等監修國史勅

蘇頌

勅古之王者代有史臣以日繫月屬詞比事舉而則書
用存有法事而不法是謂空言蓋褒貶之重慎也自非
經術文雅進德修業出忠入孝匡俗佐時為朕寶臣有
邦良輔者孰可綜覈班紀發揮蒼籀銀青光祿大夫守
中書令上柱國燕國公張說銀青光祿大夫守兵部尚
書同中書門下平章事三品上柱國梁郡開國公姚元

之等並可監修國史餘各如故

先天二年十一月二十二日

宋璟蘇頲修國史勅

古之良臣實難其人掌邦國之事明勸懲之道是以淑
駿弘簡茂先博物爰自重臣式膺兼領銀青光祿大夫
吏部尚書兼黃門監上柱國廣平郡開國公宋璟明允
篤誠有犯無隱銀青光祿大夫行紫微侍郎黃門平章
上柱國許國公蘇頲忠肅恭懿察微知彰並光我國楨
熙我帝載在公聞山甫之頌抗直有史魚之節王言斯

典曾是獻替君舉必書亦惟褒貶宜崇鼎鉉之任更述盤盂之篇並可修國史餘如故

蕭嵩集賢院學士修國史勅

明乎國史所以弘闡大猷觀乎人文所以化成天下自非鈞深學海囊括詞林盛周公之典謨懸仲尼之日月何以纂叙鴻業允諧僉能兵部尚書兼中書令蕭嵩自天生德惟國之楨孝友溫仁稟於性與明密忠謹自然道合禮樂資其黼藻風雅由其發揮足以掌書殿之秘文

紬史策之微烈論道而講學司論而記言俾垂作範之
規用成不刊之典可兼集賢殿學士知院事兼修國史

裴光庭弘文館大學士制

政理鴻業弘之者大賢文儒盛典之者茂德自非夔
龍間出周孔挺生則無以翊贊經綸發揮圖史者矣侍
中兼吏部尚書裴光庭忠公性與禮樂天資為社稷之
臣總喉舌之任儀刑百辟則庶績其凝藻鏡九流則具
瞻惟允進規獻替明謨每竭絕編囊簡成誦不忘固可

以論道之餘聞尊儒之義緯經廟堂之略論思秘館之
文僉曰爾諧期於予理往膺寵命克昭丕績可充弘文
館大學士餘如故

陳希烈監秘書省圖書制

國之載籍政之本源故藏於蓬山緘以芸閣者以為義
府之成謨三五以還皆率茲道也故每加求購冀補遺
逸四部名目悉索而采七略條流無該頗盡豈若羽陵
之蠹簡汲冢之殘編如聞頃者以來不存勾當或詮次失

序或鈎深涉踈或擅取借人或潛將入已因循斯甚散
失遂多思革前弊允資盛德宜令左相兼武部尚書陳
希烈充監秘書省圖書爰假丹青之餘以著鉛黃之美
則金華侍讀足繼寵於班伯石渠司籍方嗣徽於劉向
至公之選可不務乎

齊抗修國史制

勅天工人代緝熙庶績所以達四方之志遂萬物之情
王猷以穆在乎宰執君舉必書弘厥史職典領著作允

資蓋臣中散大夫守中書侍郎同中書門下平章事上
柱國賜紫金魚袋齊抗文合大雅行歸中庸弘道而致
遠含章而樹業稽三王之法志酌千古之獻言積純粹
而外發德輝自明誠而居為國器擢登密勿每竭訐謨
察其忠諒多所弘益以序王道之端辨人事之紀勸懲
教化在於春秋錯綜裁成必歸良直以中樞之餘力得
東觀之全才山甫補闕已彰於匪懈臧文立言佇聞於
不朽修明簡策惟爾之休可兼修國史餘並如故

李藩弘文館大學士制

勅朕思欲恢弘大化登予治平翔聲教於鬼區煥日月
於黃道士網開而萬寓垂澤泰階峻而百神受職叶於
夢卜天其賚予朝議大夫守門下侍郎同中書門下平
章事上柱國賜金紫魚袋李藩德宇凝粹神襟超曠量
寬而不入塵滓理當而不留枝葉治古人之道為君子
之儒溫然玉容流競斯遠絜矩以居正開誠以納忠起
草野之廢滯通天下之和惠內則褒美良能塞邪枉之

路外則銷鑠災患寧黔首之艱廣予聰明弘益良厚言
念報禮發乎深衷爰加書圃之職用飾賢人之榮寵靈
斯重汝其敬之可兼弘文館大學士餘如故

元和四年三月二十

日八

牛僧孺集賢館大學士監修國史制

門下寅亮天工弼諧庶務弘我一德撫綏萬邦佐予冲
人以底于理時推恩于天下必首自於輔臣是用極其
褒崇增其命數訓正圖書之府裁成義例之條銀青之

階光於七命茲所以賞勞而馭貴也正議大夫守中書
侍郎同中書門下平章事上柱國奇章縣開國子食邑
三百戶賜紫金魚袋牛僧孺大玉不琢喬松挺姿文探
典謨學貫流略自綸閣掌誥會府貳卿聲聞實彰仁德
歸厚先朝因嘉其器業爰命奮庸秉事君之小心蘊難
奪之大節往以聖體違豫潛心保和乃能畫一時平守
而不失朕自膺寶歷深仗股肱每申勇退之榮用廣進
賢之路損而招益謙乃彌光實簡朕心克諧僉矚刊魚

魯於往籍垂褒貶於國書勉承新恩無替舊服可除銀
青光祿大夫守中書侍郎同中書門下平章事兼集賢
殿大學士監修國史

李固言崇文館大學士等制

聞至業敷大化實賴於忠賢逐奸慝去黨比必資於正
直非學推間代道茂經邦則安能秉是鈞衡贊予鴻業
朝散大夫守門下侍郎同中書門下平章事上柱國賜
紫金魚袋李固言剛毅自任端嚴不回常懷疾惡之心

每負佐時之業頃者奸雄蔽過黨比相連非爾固言執諫
孰開予意面陳至懇章疏繼來辨虞卿宗閔之傾邪明
蕭澣李漢之朋附爰付大任益彰器能勵乃公忠副予
委遇朝議大夫守中書侍郎同中書門下平章事上柱
國姑臧縣開國男食邑三百戶賜紫金魚袋賈餗抱忠
與義秉直端誠文包經濟之方學達古今之奧自付以
樞柄咨其謀猷瀝懇盡規夙夜匡補竭傅說之啟沃致
山甫之將明而又舉善推賢孜孜匪懈苟利於國知無

不為惟岳降神邦家永賴於戲貞觀之初共推房杜之
德開元之際又稱姚宋之賢思得其人常勞寤寐但使
固言謹直除四凶以肅清餽推至公披八元以輔弼進
之邦家庶叶斯美是宜榮加書府之職寵兼文館之任
其監綜史氏以潤色大猷仍進崇階用獎忠孝勉服新
命無替前勞固言可銀青光祿大夫宗文館大學士兼
修國史餽可銀青光祿大夫充集賢殿大學士監修國
史餘如故

魏謩監修國史等制

門下大官之崇嚴史閣之要重書殿之清秘近代以來
率命相臣總統其務寵擢遷轉允諧舊規金紫光祿大
夫門下侍郎兼兵部尚書門下平章事監修國史上柱
國彭陽縣開國男食邑三百戶令狐綯上才經邦正德
宰物瑚璉重器宜升清廟之中銀青光祿大夫守中書
侍郎兼禮部尚書同中書門下平章事集賢殿大學士
上柱國魏謩直道事主宏國佐時珪璋瑞安早登太壇

之上金紫光祿大夫中書侍郎兼戶部尚書同中書門
下平章事上柱國河東縣開國子食邑五百戶裴休忠
力許國清規立朝鸞鳳異儀高舉重霄之外並富有天
爵深於人文早懷匡濟之姿素蘊生靈之望洎處台位
畢陳廟謨能肩一心以暢萬務識我憂勤之旨罄其弼
亮之誠邊疆寢寧風雨咸若念此丕績懷于深衷今則
各新寵章迭領重職所宜闡清靜玄默之化正褒貶予
奪之業因此嘉命啟吾規詞夫獻忠言則君受益秉公

心則人無怨除吏當則衆職舉下令一則百度美是乃
吾三后前所施為也余尚憂屬重事切磨終始不虧乃
曰良相絢可守本官充太清宮使暮可守本官監修國
史休可守本官充集賢殿大學士散官勲封各如故主

者施行

大中九年
七月七日

令狐絢弘文館大學士制

門下夫茂育羣生動資良弼緝熙庶績表正萬邦非竭
力戴君推誠憂國則何以光膺鼎鉉高步瀛洲十載於

茲四方無事昭文脩德屬自台臣金紫光祿大夫門下
侍郎兼兵部尚書中書門下平章事充太清宮使上柱
國彭陽縣開國男食邑三百戶令孤絢保合太和從容
中道左右王化清夷國風輔相盡天地之宜啓沃見忠
貞之節直氣能斷嘉猷自新納誨之心義形於色於戲
發號出令表率寰區妙運樞機式弘敷錫山甫補袞夷
吾佐時勉極殊勲書於太室朕以虛懷委遇於道始終
佩服斯言敬承嘉命可充弘文館大學士餘並如故主

者施行

大中九年九月三十日

鄭朗監修國史等制

門下二相股肱與我同體致夷率化致俗清刑致戢干戈致調風雨垂衣無事良有愧焉安得不資刊削之能佇討論之妙振揚史職開啟儒風予非敢私並膺此命通議大夫守中書侍郎兼吏部尚書同中書門下平章事充集賢殿大學士上柱國賜紫金魚袋鄭朗道邕時傑性蘊天和得中庸之隱微合大雅之明哲大中大夫

守工部侍郎同中書門下平章事上柱國賜紫金魚袋
崔慎由器稟人秀材為國楨達智者之變通有良臣之
規矩皆學窮閭奧文擅精華辨理必造於事機吐詞同
歸於根本松筠挺色莫畏嚴霜鵬鷺凌空自有俊氣况
協贊大政允釐萬方沃心克聞舉直無隱圖是諮劾彰
其茂功斯用迭升俾洽嘉命主張懲勸總領典墳必使
書法彌精動契春秋之旨化為重豈惟魚魯之文勉
弘大猷罔替朕命朗可監修國史慎由可充集賢殿大

學士餘各如故主者施行

大中十一年三月九日

崔慎由監修國史等制

門下惟政之艱非賢勿又用熙庶績實仗羣材頃所以
旰食宵衣勤求機衡之寄咸得時哲副予虛懷大中大
夫守工部尚書同中書門下平章事集賢殿大學士上
柱國賜紫金魚袋崔慎由器識淹通風鑑明秀黃香之
祇勤爾功壺遂之深衷足稱朝散大夫守尚書兵部侍
郎同中書門下平章事判度支上柱國彭城縣開國男

食邑三百戶賜紫金魚袋蕭鄴操履清方詞調凝遠孔光
之慎密早著山甫之將明可嘉而並弘典墳博通理奧
亟更顯重雅有風教允副僉諧當茲鈞軸延謀時務稽
參政途盡心力以經邦弘禮樂而緯俗羣善必舉庶官
乃和可以勒美太常書忠甲令者矣今則三秋式稔四
境無虞乃眷股肱厥有成績至於總史官之微婉備帷
幄之講求繼美臯夔比良遷董顧茲茂典式示褒優敬
爾在公服我休命慎由可監修國史鄴可充集賢殿學

士餘如故王者施行

大中十一年十月十七日

蕭鄴監修國史等制

門下康濟生靈必在陶甄之化稽參政事允歸王佐之才况乎元首股肱義均驛心同德予懷所嘉式兼刊綜之榮用舉褒隆之典朝散大夫守工部尚書同中書門下平章事充集賢殿大學士上柱國彭城縣開國男食邑三百戶賜紫金魚袋蕭鄴襟神清肅器鑒精通敷贊大猷孫弘有慎厚之行朝議大夫尚書戶部侍郎同中

書門下平章事判度支上柱國賜紫金魚袋劉琢業履
清方風標峻整彌綸庶務安國乃任職之臣而皆詞煥
丹青道潤金璧匡衡貢禹經術該明孔光師丹議論寬
博或頃司邦計茂底慎之規或嘗擁節旄著繕完之績
洎膺樞近益暢謨猷每見沃心實諧注意俾厥后為堯
舜納百姓於休和即竭乃誠期於子理子長子駿之職
石渠天祿之書稽合異同成我褒貶儒雅之任迭處攸
宜式表茂勲用榮兼領永綏寵渥往孚于休鄴可監修

國史琢可兼充集賢殿大學士餘各如故主者施行中

十二年二月十八日

夏侯孜集賢殿大學士制

門下朕居兆人之上當萬幾之廣戎夷式叙陰陽克調
實賴宗社降靈輔弼宣力臻彼富庶至于洽平既彰大
明益佇化成之妙載頌台席用盛儒林之選朝請大夫
守尚書兵部侍郎同中書門下平章事充諸道鹽鐵轉
運使上柱國賜紫金魚袋夏侯孜材協國楨道稱王佐

以孝友為家行以禮樂為身文黃陂納寬澗松挺節雄
詞擅雅興學洞微利刃發硃而肯綮無滯代天宰物而
埏埴有餘薰然至和霈若潛潤况精列圖籍煥開禁垣
高列俊髦翔集近署雅歸清重方在總樞廣暢事功顯
揚懿美是宜更一乃志愈專乃衷吐辭雖酌於當今學
正必思於稽古俾密勿之際啓沃之間無忘我以三墳
五典更光丕績永孚于休可充集賢殿大學士餘並如

故主者施行

大中十三年八月

白敏中弘文館大學士等制

門下朕初承天序方崇政源屬在輔臣兼領重職況仙
宮至嚴專總尤切儒林之盛分列掖垣良史之能必歸
懲勸將欲比肩上古耀美一時克副旁求允膺茂典特
進守司徒兼門下侍郎同中書門下平章事上柱國太
原郡開國公食邑三千戶白敏中氣稟岳靈道洽王佐
致君之志發於深誠銀青光祿大夫守中書侍郎兼刑
部尚書同中書門下平章事充集賢殿大學士上柱國

譙縣開國男食邑三百戶夏侯孜材為國楨望貫人表
濟物之用彰於顯仕金紫光祿大夫守中書侍郎兼工
部尚書同中書門下平章事上護軍樂安縣開國男食
邑三百戶蔣伸識蘊生知衆推邦傑徇公之操本乎進
忠並詞峰峭拔高踰列岫學海深奧遠含百川處彼巖
廊付以衡軸動有弘益居然矩儀叶心而和平造膝而
啓沃式諧僉議能弼予違乃知其功信無與讓是用思聞
玄化冀揚清靜之規彌在立言更佇刊削之妙資其討

論必以化成為先副我虛襟感佩嘉命敏中可兼充太

清宮使弘文館大學士餘各如故主者施行

大中十四
年正月十

六
日

王鐸弘文館大學士等制

門下韋絃互佩則情性和文武兼修則事功濟況岩廊
重德柱石賢臣方當弭寇之時正委運籌之畧各覃恩
渥用獎勲勞開府儀同三司守門下侍郎兼司徒同中
書門下平章事上柱國晉國公食邑三千戶王鐸太極

諸精華池稟潤文能師古業擅經邦光顯數朝偃仰三
事挺許國忘家之節蘊經天緯地之才金紫光祿大夫
守中書侍郎兼禮部尚書同中書門下平章事上柱國
裴徹玉海澄瀾金莖擢秀泉停襟抱岳立標儀道則有
常材惟不器松竹見後彫之操輪輓彰致遠之功銀青
光祿大夫守尚書工部侍郎同中書門下平章事上柱
國蕭邁維嶽降神昴星應瑞琳瑯瑩茂雲日孤高業著
代天澤惟周物偉望而汪洋自遠清規而峻拔難偕並

智比著龜祥同麟鳳備彰器業遍踐清華雲霄次第以
登臨臺閣從容而履歷或爵為國老或宛是台臣人無
間言朕所注意自妖兇構逆巡幸西來皆能問道以潛
奔竟致臨軒而再會益堅臣節仍罄廟謨杜南征注傳
彰閑謝安石圍碁決勝每聞盡瘁尤切圖功更宜講貫
安危錯磨理本用蕭曹之秘畧繼房杜之高蹤佇見中
興實資良術再踐大紹之位三居文館之權首鎮元台
備兼衆務或官當喉舌職重陽秋或位正中樞榮兼秘

殿大儀峻秩馭貴崇階式示優恩更申獎勵早清巨孽
俾振皇綱使雲龍魚水之歡永光於竹帛鐸可司徒兼
侍中充太清宮使弘文館大學士兼延資庫使散官勲
封如故徹可特進行門下侍郎兼兵部侍郎同中書門
下平章事監修國史勲封如故邁可光祿大夫行中書
侍郎兼禮部尚書同中書門下平章事充集賢殿大學
士勲封如故主者施行

蕭邁監修國史等制

門下宰相之任調元氣以作輔持大柄以匡君况狂寇
未平戎車尚駕顧我勤勞之意在茲籌畫之功雖循舊
規式加新寵光祿大夫行中書侍郎兼禮部尚書同中
書門下平章事充集賢殿大學士上柱國蕭邁琮璜重
器韶濩正音灑落襟靈品流多士有山甫補袞之功抱
子房借箸之謀銀青光祿大夫行兵部侍郎同中書門
下平章事上柱國韋昭度山岳蘊靈星辰耀彩澄澹不
撓端莊自持懇懇常務於燮諧孜孜不忘於贊理而皆

便蕃顯貫履歷清華為宗廟之棟梁作邦家之柱石言
成損益知合著龜彌彰及雷之誠盡著匪躬之節每聽
爾嘉話寬我殷憂所宜縱堂上之奇兵彌茲寇孽啓胸
中之利器剪彼妖狂佇見中興之期須茲輔臣之力安
危是注倚仗彌深地官既示其加恩大儀式彰其峻秩
掌東觀陽秋之重總石渠刊校之權茂勲增榮崇階示
貴久處黃閣宜正紫垣庶其廣運籌謀速見平蕩佇丹
青垂美鼎勲高永茲魚水之歡用契雲龍之會承我

茂寵爾其勉之邁特進行中書侍郎兼戶部尚書同中書門下平章事監修國史勲如故昭度可光祿大夫行中書侍郎兼禮部尚書同中書門下平章事充集賢殿大學士上柱國主者施行

唐大詔令集卷五十一